

MD 43

Metodološki dokument

ISSN 1840-1074

STATISTIČKI POSLOVNI REGISTAR

Metodološke osnove



Bosna i Hercegovina

**Agencija za statistiku
Bosne i Hercegovine**

**Federalni zavod za statistiku
Federacije BiH**

**Republika Srpska
Republički zavod za statistiku**

Sarajevo, 2015.

Izdaje: Agencija za statistiku Bosne i Hercegovine,
Zelenih beretki 26, 71000 Sarajevo,
Bosna i Hercegovina
Telefon: +387 33 91 19 11; **Telefaks:** +387 33 22 06 22
Elektronska pošta: bhas@bhas.ba; **Internet stranica:** www.bhas.ba

Odgovara: Fadil Fatić, zamjenik direktora

Podatke pripremili: Odsjek za Statistički poslovni registar i ekonomske klasifikacije
Agencija za statistiku BiH,

Odsjek za poslovni, statistički registar i ekonomske klasifikacije,
Federalni zavod za statistiku FBiH,

Odsjek za registar, uzorke i klasifikacije,
Republički zavod za statistiku RS.

Lektura: Amra Kapetanović

Dizajn i prijelom: Lejla Rakić Bekić

Štampa: A Dizajn d.o.o. Sarajevo

Molimo korisnike Publikacije da prilikom upotrebe podataka obavezno navedu izvor.

Uvod

Cilj ovog dokumenta je prezentovati osnovne informacije o Statističkom poslovnom registru (SPR), kao i njegovu ulogu u statističkoj proizvodnji Bosne i Hercegovine.

Statistički poslovni registar (SPR) predstavlja evidenciju svih poslovnih subjekata. SPR sadrži osnovne identifikacione i adresne podatke o preduzećima, podatke o njihovim djelatnostima kao i indikatore veličine preduzeća formirane na osnovu finansijskih podataka i podataka o broju zaposlenih.

U procesu uspostavljanja Statističkog poslovnog registra u punoj mjeri su se poštovali zahtjevi osnovne EU Regulative 177/2008 u ovoj oblasti statistike u cilju pune harmonizacije sa evropskim standardima.

SPR tim sve tri statističke institucije kontinuirano radi na poboljšanju kvaliteta i sadržaja podataka Statističkog poslovnog registra kroz bolje korištenje podataka sakupljenih statističkim istraživanjima, obuhvatnije korištenje dostupnih administrativnih izvora, te ostvarenje pristupa drugim administrativnim bazama (prvenstveno Upravi za indirektno oporezivanje).

Lista skraćenica

APIF - Agencija za posredničke, informatičke i finansijske usluge
BDBiH - Brčko distrikt BiH
BHAS – Agencija za statistiku Bosne i Hercegovine
BiH – Bosna i Hercegovina
BR – Business Register
CARDS - Pomoć Zajednice za obnovu, razvoj i stabilizaciju balkanskih zemalja
CB BiH - Centralna banka Bosne i Hercegovine
EC – Evropska komisija
EU – Evropska unija
EUROSTAT - Statistički ured Evropske zajednice
FBiH – Federacija BiH
FIA - Finansijsko informatička agencija
FZSBIH - Federalni zavod za statistiku Federacije Bosne i Hercegovine
IPA - Instrument pretpristupne pomoći
KD - Klasifikacija djelatnosti
KD BiH 2010 – Klasifikacija djelatnosti Bosne i Hercegovine 2010
NACE Rev.2 - Statistička klasifikacija ekonomskih djelatnosti Evropske unije
RS – Republika Srpska
RZSRS - Republički zavod za statistiku Republike Srpske
SIDA - Švedska agencija za međunarodnu razvojnu saradnju
SPR – Statistički poslovni registar
UIO BiH - Uprava za indirektno oporezivanje Bosne i Hercegovine

Sadržaj

1. STATISTIČKI POSLOVNI REGISTAR (SPR) – UVOD	7
1.1. STRUKTURA STATISTIČKOG SISTEMA U BOSNI I HERCEGOVINI	7
1.2. USPOSTAVA SPR-A U BOSNI I HERCEGOVINI	9
1.3. PRAVNA OSNOVA SPR-A.....	10
1.4. CILJEVI I PRINCIPI SPR-A.....	10
2. USKLAĐIVANJE STATISTIČKIH POSLOVNIH REGISTRARA	11
2.1. ZAŠTO USKLAĐIVATI STATISTIČKE POSLOVNE REGISTRE?.....	11
2.2. ŠTA USKLAĐIVATI U STATISTIČKIM POSLOVNIM REGISTRIMA?	12
2.3. USKLAĐIVANJE STATISTIČKOG POSLOVNOG REGISTRA BOSNE I HERCEGOVINE	13
3. SADRŽAJ STATISTIČKOG POSLOVNOG REGISTRA	14
3.1. IDENTIFIKACIONE VARIJABLE	14
3.2. STRATIFIKACIONE VARIJABLE.....	15
3.3. DEMOGRAFSKE VARIJABLE.....	16
3.4. OSTALE VARIJABLE.....	16
4. JEDINICE SPR-A	17
4.1. JEDINICE SPR-A I NJIHOVE MEĐUSOBNE VEZE	17
4.2. PRAVNA JEDINICA	17
4.3. LOKALNA PRAVNA JEDINICA	18
4.4. PREDUZEĆE.....	18
4.5. LOKALNA JEDINICA.....	18
4.6. JEDINICA IZVJEŠTAVANJA	19
4.7. JEDINICA POSMATRANJA	19
5. IZVORI I NAČIN PRIKUPLJANJA PODATAKA	19
5.1. IZVORI PODATAKA ZA SPR	19
5.2. IZVORI ZA ODREĐIVANJE STATUSA AKTIVNOSTI PREDUZEĆA	20
6. AŽURIRANJE STATISTIČKOG POSLOVNOG REGISTRA	21
6.1. AŽURIRANJE IZ ADMINISTRATIVNIH REGISTRARA	21
6.2. AŽURIRANJE IZ OSTALIH IZVORA	21
7. PRISTUP STATISTIČKOM POSLOVNOM REGISTRU I RAZMJENA PODATAKA IZMEĐU STATISTIČKIH INSTITUCIJA	22
7.1. PRISTUP BAZI PODATAKA SPR-A KROZ APLIKACIJE.....	23
7.2. RAZMJENA PODATAKA IZMEĐU STATISTIČKIH INSTITUCIJA	23



1. STATISTIČKI POSLOVNI REGISTAR (SPR) – UVOD


1.1. Struktura Statističkog sistema u Bosni i Hercegovini

Prema Zakonu o statistici Bosne i Hercegovine postoje tri službene statističke institucije (prikazano na slici 1) koje su u skladu sa administrativnim uređenjem Bosne i Hercegovine i to:

- Agencija za statistiku Bosne i Hercegovine (BHAS), smještena u Sarajevu, odgovorna za proizvodnju statistike na nivou Bosne i Hercegovine;
- Federalni zavod za statistiku Federacije Bosne i Hercegovine (FZS FBiH) smješten u Sarajevu, odgovoran za proizvodnju statistike za nivo entiteta Federacije Bosne i Hercegovine;
- Republički zavod za statistiku Republike Srpske (RZSRS), smješten u Banja Luci, odgovoran za proizvodnju statistike za nivo entiteta Republika Srpska.

Agencija za statistiku Bosne i Hercegovine u svom sastavu ima Podružnicu smještenu u Brčkom, koja je odgovorna za proizvodnju statistike za Brčko distrikt BiH (BDBiH).

Slika 1. Struktura Statističkog sistema u BiH



Osobe odgovorne za statistički poslovni registar

Agencija za statistiku Bosne i Hercegovine:

Dubravka Husić (+387) 33 911 951 dubravka.husic@bhas.ba
Mevlija Odobašić (+387) 33 911 942 mevlija.odobasic@bhas.ba
Ivana Tavra Čolo (+387) 33 911 941 ivana.tavra@bhas.ba
Dženita Mustafić (+387) 33 911 943 dzenita.mustafic@bhas.ba

Federalni zavod za statistiku Federacije Bosne i Hercegovine:

Enisa Rastić (+387) 33 407 012 ili 265 890 enisa.rastic@fzs.gov.ba
Emira Beširević (+387) 33 407 011 lok. 226 emira.besirevic@fzs.gov.ba
Nidžara Obarčanin (+387) 33 407 012 lok. 227 nidzara.obarcanin@fzs.gov.ba
Envera Hurić (+387) 33 407 011 lok. 226 envera.huric@fzs.gov.ba

Republički zavod za statistiku Republike Srpske:

Nada Malinović (+387) 51 332 723 nada.malinovic@rzs.rs.ba
Nataša Teinović (+387) 51 332 723 natasa.teinovic@rzs.rs.ba

1.2. Uspostava SPR-a u Bosni i Hercegovini

U svim zemljama članicama EU uspostava poslovnih registara je od fundamentalnog značaja za kompilaciju statistika potrebnih da bi se dobili pokazatelji o kratkoročnim privrednim kretanjima i strukturnom ekonomskom razvoju.

U skladu sa potrebom za usklađivanjem statističkog sistema Bosne i Hercegovine sa statističkim sistemima zemalja Evropske Unije stvoreni su uslovi za uvođenje statističkog poslovnog registra (SPR-a) u statistički sistem.

Glavni cilj CARDS Twinning projekta (2006-2008) je bio uspostavljanje SPR-a za nivo BiH, za oba entiteta i Brčko distrikta BiH, a koji zadovoljava potrebe statističkog sistema. U tom periodu je kroz projekat uz pomoć i podršku eksperata statistike Danske uspostavljen osnovni model SPR-a. SPR tim, koji u skoro istom sastavu radi i danas, bio je sastavljen od predstavnika sve tri statističke institucije u BiH.

Po završetku CARDS Twinning projekta (2006-2008) u 2009. godini je nastavljena saradnja statističkih institucija na daljoj izgradnji i unapređenju SPR-a na praktičnom i metodološkom nivou, uz finansijsku potporu Švedske statistike (SIDA projekat).

Kroz SIDA projekat unaprijeđen je on-line sistem za statistička istraživanja kao poseban dio aplikacije SPR-a, koji je prilagođen za smještanje odgovarajućih podataka iz statističkih istraživanja.

Uspostavljeni SPR je usaglašen prema EU regulativama i preporukama i koristi se od 2009. godine kao zajednički okvir za statistička istraživanja.

Kroz IPA-regionalni projekat (2010/2011) nastavljen je rad na poboljšanju nivoa usklađenosti SPR-a sa EU Uredbom o SPR-u (Regulation EC No 177/2008) kojom se uspostavlja jedinstveni okvir poslovnih registara za statističke potrebe. Sve zemlje članice EU popunjavaju jednom godišnje upitnik (Business Registers Annual Inquiry) kojim se mjeri kvalitet statističkih poslovnih registara. Kroz ovaj projekat je prvi put popunjen ovaj upitnik za nivo BiH i napravljena procjena nivoa usklađenosti našeg SPR-a sa EU Uredbom.

Kroz aktivnosti IPA 2008 nacionalnog projekta unaprijeđen je kvalitet SPR-a, i kao glavni cilj projekta, ostvarena njegova upotreba za provođenje statističkih istraživanja.

Krajem 2014. godine započelo je provođenje IPA 2012 nacionalnog projekta kroz koji će se u saradnji sa nacionalnim računima implementirati institucionalni sektor u SPR. Kroz isti projekat će se osigurati metodološka osnova za uvođenje grupa preduzeća u SPR i praćenje poslovne demografije preduzeća. Priprema izlaznih tabela sa podacima o aktivnim, novoosnovanim i ugašenim preduzećima neophodnih za izvještavanje o poslovnoj demografiji odvija se zajedno sa Odsjekom strukturnih poslovnih statistika. Očekuje se da će nakon završetka ovog projekta usklađenost sa evropskim propisima i priručnikom preporuka, kao i teoretska i praktična znanja SPR osoblja biti značajno unaprijeđena.

Agencija je prvi put, u septembru 2011, objavila saopštenje o broju preduzeća (bez preduzetnika) u SPR-u. Saopštenje je sadržavalo podatke o broju preduzeća (bez preduzetnika) razvrstanih po ekonomskim djelatnostima, klasama zaposlenih i klasama prihoda, a na osnovu podataka iz administrativnih poslovnih registara, godišnjih finansijskih izvještaja, podataka iz Centralne banke BiH (CB BiH) i rezultata statističkih istraživanja.

Do sada su provedena tri posebna istraživanja, prvo u 2012. godini „Istraživanje o unaprijeđenju kvaliteta podataka u SPR-u“, drugo tokom 2013. godine „Istraživanje o lokalnim jedinicama“ i treće „Istraživanje o glavnoj djelatnosti u SPR-u“ 2014. godine.

U ovoj, 2015. godini, je u toku provođenje istraživanja o aktivnosti preduzeća.

Statističke institucije i dalje intenzivno rade na poboljšanju kvaliteta podataka, na daljem unaprijeđenju metodologije vođenja, ažuriranja i obrade podataka, na uključivanju novih izvora podataka, kao i na daljem usaglašavanju SPR-a sa evropskim standardima.

1.3. Pravna osnova SPR-a

Zakoni na nivou države Bosne i Hercegovine:

- Zakon o statistici BiH („Službeni glasnik BiH“ broj 26/04 i 42/04),
- Zakon o klasifikaciji djelatnosti BiH („Službeni glasnik BiH“ broj 76/06, 100/08 i 32/10),
- Odluka o klasifikaciji djelatnosti Bosne i Hercegovine 2010 („Službeni glasnik BiH“ broj 47/10).

Zakonom o statistici BiH uređen je sistem prikupljanja i objavljivanja statističkih informacija i dogovorena primjena jedinstvenih metodologija i statističkih standarda pri izradi statističkih podataka. Godišnjim Planom rada i višegodišnjim Statističkim programom BiH decidno je utvrđeno na koji način se prikupljaju i objavljuju statistički podaci uključujući Plan publikovanja i Kalendar publikovanja za određenu godinu.

Usaglašenost sa međunarodnim preporukama, standardima i praksom

U konceptualnom smislu SPR je usklađen sa sljedećim EU regulativama:

- Regulation European Community (EC) No 177/2008 establishing a common framework for Business Registers for statistical purposes
- Regulation EC No 696/1993 on the statistical units and observation and analysis of the production system in the Community
- Regulation EC No 1893/2006 establishing the statistical classification of economic activities NACE Revision 2

Pored navedenog SPR se oslanja i na sljedeće međunarodne preporuke:

- Recommendations Manual – BR for Statistical purpose
- Seminari i metodološki materijali radnih grupa EUROSTAT-a, iskustva i praksa drugih evropskih statistika.

1.4. Ciljevi i principi SPR-a

Statistički poslovni registar je registar koji se vodi u cilju prikupljanja informacija o poslovnoj zajednici u BiH sa statističke tačke gledišta i koji se koristi samo u statističke svrhe. On je ažuran izvor poslovnih subjekata koji su aktivni na teritoriji Bosne i Hercegovine, koji ostvaruju prihode i koji posjeduju relevantne statističke i administrativne karakteristike. To je sistem koji pretvara podatke iz administrativnih izvora u podatke pogodne za statističku upotrebu. SPR predstavlja osnovu za provođenje statističkih istraživanja i služi kao okvir za pravljenje (dizajn) uzorka za statistička istraživanja, kao i za praćenje poslovne demografije statističkih jedinica.

Osnovni ciljevi postojanja SPR-a su:

- **Obuhvat** – Cilj SPR-a je da obuhvati što je više moguće od državne ekonomske aktivnosti, iako postoji rastući odnos troškova prema koristima kada se teži obuhvatu najmanjih jedinica, tako da se neka vrsta granične linije obično primjenjuje u praksi.
- **Kvalitet** – Visok kvalitet SPR-a pomaže unaprijeđenju efikasnosti statističkog sistema Bosne i Hercegovine, koji povratno može pomoći da se smanji opterećenje izvještajnih jedinica.
- **Autoritet** – SPR služi kao osnovni izvor podataka za provođenje statističkih istraživanja.

SPR, u skladu sa postavljenim ciljevima, projektovan je na utvrđenim osnovnim principima sveobuhvatnosti, ažurnosti, racionalnosti i povjerljivosti.

- **Princip sveobuhvatnosti** - SPR obuhvata sve jedinice ekonomske aktivnosti na teritoriji Bosne i Hercegovine, bez obzira na oblik organizovanja, veličinu i djelatnost.
- **Princip ažurnosti** – Ovaj princip se odnosi na kontinuirano evidentiranje svih nastalih promjena u toku aktivnosti jedinice registra kao i na ažuriranje kompletnog SPR-a na osnovu podataka prikupljenih statističkim upitnicima koje popunjavaju jedinice registra, kao i na osnovu podataka koji se prikupljaju iz administrativnih izvora.
- **Princip racionalnosti** - Pošto SPR služi kao okvir za sva statistička istraživanja neophodno je poštovati princip koji podrazumijeva smanjenje opterećenja izvještajnih jedinica traženjem istih podataka, samo za različita istraživanja, po nekoliko puta.
- **Princip povjerljivosti** – Podaci o svim jedinicama ovog registra su povjerljivi i koriste se isključivo u statističke svrhe što je regulisano Zakonom o statistici.

2. USKLAĐIVANJE STATISTIČKIH POSLOVNIH REGISTARA

2.1. Zašto usklađivati statističke poslovne registre?

U svim državama članicama EU dostupnost SPR-a je od presudne važnosti za proces prikupljanja ekonomskih statističkih podataka potrebnih za dobijanje slike o kratkoročnom ekonomskom razvoju i za prikupljanje podataka o strukturi privrede. Obuhvat i kvalitet SPR-a u velikoj mjeri varira od zemlje do zemlje ali ostvarivanje postojane i konkurentne statistike ne može se postići bez prethodno izvedene standardizacije statističkih poslovnih registara.

Jedinstveno tržište podstiče pojavu novih i brojnijih zahtjeva za informacijama o strukturi preduzeća. Prisutan je porast internacionalizacije preduzeća uz formiranje multinacionalnih kompanija koje se šire izvan granica država, a o kojima su potrebni podaci.

U mnogim zemljama vrši se sve veći pritisak u nastojanjima da se smanji teret preduzećima koji se odnosi na njihovu obavezu da dostavljaju informacije za statistička istraživanja. Nasuprot tome, nezavisno od bilo kakve potrebe za informacijama o samostalnim preduzećima, Eurostat zahtijeva poboljšanja u vođenju statistike i predviđa pojavu novih zahtjeva za informacijama (npr. uslugama ili malim i srednjim preduzećima).

SPR omogućava upotrebu istih informacija u različite svrhe kao i da se istraživanja provode efikasnije i ekonomičnije među različitim preduzećima. Stoga postojanje usaglašenih statističkih poslovnih registara pomaže da se preduzećima olakša izvještavanje.

2.2. Šta usklađivati u statističkim poslovnim registrima?

➤ Definicija jedinica

Kako bi se državama članicama EU i njihovim institucijama omogućilo da uporede i udruže svoje statističke sisteme, moraju na raspolaganju imati kompletiran i zajednički skup statističkih jedinica.

Ovo podrazumijeva sljedeće:

- a) svaka statistička jedinica ima zajedničku definiciju i ta definicija mora biti jedinstvena;
- b) skup statističkih jedinica mora uvijek biti dostupan za korištenje svakoj državi članici.

Kako su postojeće definicije statističkih jedinica, od strane država članica, različito tumačene i primjenjivane u praksi, rad na njihovom usklađivanju je nastavljen i dalje.

➤ Obuhvat

U teoriji, statistički poslovni registri bi trebali sadržavati sva preduzeća i njihove lokalne jedinice koje su aktivne u nacionalnoj ekonomiji. Kako ovo nije moguće uvijek ostvariti u praksi, u svrhu međunarodne uporedivosti, poželjno je da se pokrivenost poslovnih registara uskladi sa dogovorenim standardima. Uredba o poslovnim registrima definiše jedinice koje se trebaju uvrstiti u SPR. Prema važećoj Uredbi, kao glavne statističke jedinice SPR-a, navode se grupa preduzeća, preduzeće i lokalna jedinica. Prema istoj Uredbi se traži da SPR sadrži i informacije o pravnim jedinicama koje pripadaju preduzeću.

➤ Ažuriranje

Subjekti koji predstavljaju jedinice u statističkom poslovnom registru nisu statični, mijenjaju se. Oni se osnivaju, mogu promijeniti pravni oblik organizovanja, karakteristike ili prestati sa radom. Pravila i procedure za evidentiranje ovih promjena moraju biti standardizovani, a uslovi i učestalost ažuriranja usaglašeni kako bi bilo moguće praviti poređenja na međunarodnoj osnovi.

➤ Varijable

Varijable različitih jedinica moraju biti, poput samih jedinica, usaglašene. Zajedničke varijable omogućavaju uporedivost stratuma u uzorcima kao i usaglašenost relevantnih poduzoraka (javnih korporacija, npr.) i standardizaciju definicija za određene izvedene jedinice.

➤ Kvalitet

Jedan od osnovnih zadataka Statističkog poslovnog registra je biti osnovna baza podataka za provođenje statističkih istraživanja, te pružiti korisnicima što je moguće viši nivo kvaliteta podataka sa kojima raspolaže. Kako bi se podigao nivo korištenja SPR-a kao osnovne baze za okvir statističkih istraživanja potrebno je prikupiti što više povratnih informacija iz statističkih istraživanja i time omogućiti bolji kvalitet podataka potrebnih za statističku proizvodnju.

2.3. Usklađivanje statističkog poslovnog registra Bosne i Hercegovine

Statistički poslovni registar u Bosni i Hercegovini je od početka uspostavljanja bio izgrađen prema metodologiji i standardima koje propisuje EUROSTAT.

SPR obuhvata poslovne subjekte i njihove dijelove na teritoriji Bosne i Hercegovine. Uključeni su svi poslovni subjekti (pravna i fizička lica) bez obzira na veličinu i djelatnost koju obavljaju.

Podaci o administrativnim jedinicama (pravnoj jedinici i lokalnoj pravnoj jedinici) u SPR su kopija podataka iz administrativnih registara. Ti se podaci preuzimaju po šifarnicima i klasifikacijama važećim u entitetima i BD BiH.

Podaci za statističke jedinice (preduzeća i lokalne jedinice), vode se po usaglašenim jedinstvenim šifarnicima, odnosno klasifikacijama. Ovo je jedna od velikih prednosti statističkog poslovnog registra jer se na jednom mjestu po jedinstvenim šifarnicima i klasifikacijama prikupljaju podaci o preduzećima i njihovim lokalnim jedinicama sa čitave teritorije BiH.

Od 01. 01. 2011. u primjeni je nova klasifikacija djelatnosti Bosne i Hercegovine KD BiH 2010 (standard NACE Rev. 2). Primjena KD BiH 2010 u SPR-u je podrazumijevala dvostruko šifriranje poslovnih subjekata, što znači da su sve jedinice u SPR-u imale dvije šifre djelatnosti, po staroj i novoj KD. Dvostruko šifriranje u SPR-u se vodilo od 2010. do kraja 2013. godine.

Petogodišnji plan razvoja SPR-a (2013-2017), usvojen i potpisan od strane direktora tri statističke institucije, osigurava nastavak razvojnog procesa za unapređenje kvaliteta i upotrebe SPR-a, kao i dobru saradnju između SPR-a sve tri statističke institucije.

U okviru ovog plana, predviđene su aktivnosti na uvođenju grupa preduzeća, institucionalnih sektora i praćenje poslovne demografije. Realizacijom pomenutih aktivnosti, statistički poslovni registar u Bosni i Hercegovini će biti u potpunosti usaglašen sa standardima i preporukama Evropske unije. Iako Bosna i Hercegovina, kao zemlja sa statusom potencijalnog kandidata nije obavezna dostavljati podatke EUROSTAT-u, redovna godišnja transmisija podataka se vrši u propisanom formatu od 2011.

3. SADRŽAJ STATISTIČKOG POSLOVNOG REGISTRA

SPR sadrži informacije o preduzećima, lokalnim jedinicama i njihovim pravnim i lokalnim pravnim jedinicama, kao i relacije (veze) između tih jedinica.

Informacije koje je potrebno voditi za jedinice u SPR-u, a prema EU Uredbi, su razvrstane u sljedeće kategorije:

- Identifikacione varijable
- Stratifikacione varijable
- Demografske varijable
- Ostale varijable

3.1. Identifikacione varijable

- Identifikacioni brojevi
- Naziv
- Adresa
- Kontakt podaci

Identifikacioni brojevi

Identifikacioni brojevi omogućavaju prepoznavanje jedinice i njeno povezivanje, kako sa ostalim jedinicama registra, tako i sa administrativnim i statističkim bazama podataka.

Statistička jedinica ima više identifikacionih brojeva: trinaestocifreni porezni broj, jedinstveni statistički broj i matični broj iz administrativnog registra RS-a.

Trinaestocifreni porezni broj pravna jedinica dobija prilikom registracije kod nadležnog registarskog organa. Ako porezni broj počinje sa 42 ili 43 znači da je pravna jedinica registrovana u Federaciji BiH. Porezni broj pravnih jedinica registrovanih u Republici Srpskoj počinje sa 44 ili 45, dok pravne jedinice registrovane u Brčko distriktu BiH dobijaju porezni broj koji počinje sa 46 ili 47.

Porezni broj koji počinje sa 49 označava poslovno predstavništvo, strano diplomatsko predstavništvo, međunarodnu organizaciju, nerezidenta ili je riječ o registraciji po službenoj dužnosti.

Prilikom preseljenja pravne jedinice iz jednog entiteta u drugi pravna jedinica može zadržati isti porezni broj, iako to nije uvijek slučaj. Na primjer postoje pravne jedinice koje rade u Federaciji BiH, a porezni broj im počinje sa 44 ili 45, odnosno sa 46 ili 47.

Jedinstveni statistički broj služi samo za statističke svrhe i ovaj broj jedinice dobivaju prilikom evidentiranja u SPR. U skladu s EU preporukama broj je dodjeljen svakom preduzeću kako bi se napravila razlika između statističkog i administrativnog registra i omogućilo praćenje kontinuiteta jedinica.

Matični broj iz administrativnog registra RS-a pravna jedinica dobija prilikom registracije u Republici Srpskoj.

Naziv

Jedinice u SPR-u imaju puni i skraćeni naziv. Ispravnost evidentiranja naziva je od velike važnosti za identifikaciju jedinica i stoga se mora bilježiti sa velikom pažnjom.

Adresni podaci

Na svim jedinicama u SPR-u vode se sljedeći adresni podaci: šifra i naziv entiteta/distrikta, šifra i naziv kantona/regije, šifra i naziv općine, šifra i naziv naselja, ulica sa brojem objekta i poštanski broj.

Promjena adresnih podataka se vrši na osnovu informacija koje dolaze iz administrativnog registra ili iz statističkih istraživanja.

Informacije o adresi su u SPR-u obavezne i to na najdetaljnijem nivou što je u skladu sa EU Uredbom.

Kontakt podaci

Izvor podataka za broj telefona, fax i e-mail adresu predstavljaju administrativni registar i statistička istraživanja.

Sve promjene koje se odnose na kontakt podatke se vrše na osnovu informacija koje dolaze iz administrativnog registra ili iz statističkih istraživanja.

3.2. Stratifikacione varijable

U **stratifikacione varijable** spadaju:

- Djelatnost
- Veličina preduzeća
- Institucionalni sektor
- Pravni oblik organizovanja

Glavna djelatnost statističke jedinice je djelatnost koja najviše doprinosi ukupnoj dodanoj vrijednosti jedinice. U praksi, to je djelatnost iz koje jedinica ostvaruje najveći prihod ili koju obavlja najveći broj zaposlenih.

Sporedna djelatnost je bilo koja druga djelatnost jedinice, čiji se outputi (dobra ili usluge) isporučuju trećoj strani. Dodana vrijednost sporedne djelatnosti mora biti manja nego ona glavne djelatnosti.

Pomoćne djelatnosti su one koje postoje isključivo da bi pružile podršku glavnoj ili sporednim ekonomskim djelatnostima jedinice, tako što osiguravaju dobra ili usluge samo za potrebe te jedinice.

Potrebno je napraviti razliku između glavne i sporednih djelatnosti, s jedne, i pomoćnih djelatnosti, s druge strane. Glavna i sporedne djelatnosti se uglavnom obavljaju uz pomoć brojnih pomoćnih djelatnosti kao što su računovodstvo, prijevoz, skladištenje, nabavka, marketing prodaje, popravak i održavanje itd.

Veličina: broj zaposlenih i prihod

U statističkom poslovnom registru za određivanje veličine preduzeća koriste se podaci o broju zaposlenih i prihodima iz godišnjih finansijskih izvještaja.

Primarni izvor podataka o broju zaposlenih i prihodima preduzeća predstavljaju godišnji finansijski izvještaji.

Preuzimanje podataka od strane statističkih institucija u Federaciji Bosne i Hercegovine se vrši posredstvom Finansijsko informatičke agencije (FIA), u Republici Srpskoj posredstvom Agencije za posredničke, informatičke i finansijske usluge (APIF) a u Brčko distriktu BiH preko Direkcije za finansije sektora porezne uprave.

Broj zaposlenih predstavlja godišnji prosjek broja zaposlenih na bazi stanja krajem mjeseca, a prema kadrovskoj evidenciji.

Podaci o broju zaposlenih su razvrstani u klase, saglasno relevantnoj EU Uredbi, na: mikro (0-9 zaposlenih), mala (10-49 zaposlenih), srednja (50-249 zaposlenih) i velika (250 i više zaposlenih).

Prihodi uključuju tržišnu prodaju dobara i usluga trećim licima i ovi podaci su razvrstani u klase na: mikro (0-3.999.999 KM), mala (4.000.000-19.999.999 KM), srednja (20.000.000-99.999.999 KM) i velika (100.000.000 KM i više).

U SPR-u Agencije za statistiku BiH podaci iz godišnjih finansijskih izvještaja su raspoloživi u klasama u kojima su subjekti razvrstani, a za Brčko distrikt BiH i u apsolutnim iznosima.

Entitetski zavodi za statistiku raspolažu podacima o ostvarenom prihodu i broju zaposlenih u apsolutnim vrijednostima za sve jedinice registra datog entiteta.

Institucionalni sektor

Jedinice u SPR-u za sada nisu razvrstane u institucionalne sektore. Definisanje pravila za određivanje i redovno ažuriranje institucionalnih sektora radi se u Odsjeku nacionalnih računa, nakon čega će se njihova implementacija provesti u SPR. Prema planiranim aktivnostima, Nacionalni računi će početi sa uvođenjem institucionalnih sektora kroz nacionalni projekat IPA 2012.

Pravni oblik organizovanja

Prema EU Uredbi za SPR, oblik organizovanja predstavlja statifikacionu varijablu pravne jedinice.

Prema važećim zakonskim propisima, u entitetima se koriste različiti šifarnici oblika organizovanja i zbog toga je bilo neophodno njihovo usaglašavanje. Zajednički jedinstveni šifarnik za oblik organizovanja predstavlja kombinaciju šifarnika administrativnih registra FZS-a, RZSRS-a i BD BiH i obezbjeđuje jedinstvenu bazu iz koje se uzimaju adresni podaci ili izdvaja okvir za izbor uzorka za statistička istraživanja.

3.3. Demografske varijable

- Datum registracije
- Datum zadnje promjene
- Datum gašenja

3.4. Ostale varijable

U ostale varijable spadaju varijable koje pokazuju relacije sa administrativnim i statističkim registrima, podaci o vlasništvu i druge varijable koje nisu obuhvaćene identifikacionim, stratifikacionim i demografskim varijablama.

4. JEDINICE SPR-a

4.1. Jedinice SPR-a i njihove međusobne veze

Jedinice u SPR-u se mogu svrstati u tri seta jedinica i to:

- Administrativne jedinice
 - Pravna jedinica
 - Lokalna pravna jedinica
- Statističke jedinice
 - Preduzeće
 - Lokalna jedinica
- Jedinice vezane za istraživanja
 - Jedinice izvještavanja
 - Jedinice posmatranja

Postoje sljedeće veze između jedinica u SPR-u:

- pravna jedinica i preduzeće
- pravna jedinica i lokalna pravna jedinica
- preduzeće i njegove lokalne jedinice
- lokalne pravne jedinice i lokalne jedinice preduzeća
- jedinice posmatranja i jedinice izvještavanja

Veza između lokalne pravne jedinice i lokalne jedinice preduzeća nije direktna. Razlog su različiti kriteriji koji se koriste prilikom formiranja ovih jedinica. Lokalna pravna jedinica se formira prema adresi ili djelatnosti koja je različita od adrese ili osnovne djelatnosti poslovnog subjekta dok je glavni kriterij za određivanje lokalne jedinice preduzeća isključivo adresa na kojoj se ona nalazi.

4.2. Pravna jedinica

Pravna jedinica je mjesto gdje se čuvaju informacije koje se dobiju iz administrativnih sistema i koje nije moguće mijenjati.

Za pravne jedinice se prate sljedeće varijable: trinaestocifreni porezni broj, RS matični broj, puni naziv, skraćeni naziv, djelatnost, datum registracije, datum zadnje promjene, datum gašenja, vlasništvo, porijeklo kapitala, pravni oblik, tip preduzetnika, zanimanje preduzetnika, račun kod Centralne banke BiH, finansijski podaci, podaci o zaposlenosti, entitet, kanton/regija, općina, naselje, poštanski broj, naziv ulice i broj objekta, telefon, fax, e-mail, odgovorna osoba i izvor za ažuriranje.

U SPR-u na pravnoj jedinici postoji opcija pod nazivom Historija gdje se daje pregled historijskih podataka.

4.3. Lokalna pravna jedinica

Lokalna pravna jedinica je mjesto gdje se čuvaju informacije dobijene iz administrativnih registara o jedinicama u sastavu (podružnicama) pravne jedinice. Isto kao pravne jedinice, i lokalne pravne jedinice moraju biti registrovane, tako da se sa sigurnošću može reći, da je obuhvat lokalnih pravnih jedinica u SPR-u dobar.

Iste varijable postoje i za lokalnu pravnu jedinicu, izuzev onih koje su tipične samo za pravnu jedinicu (kao što su: vlasništvo, porijeklo kapitala, pravni oblik, finansijski podaci, podaci o zaposlenima).

Pregled historijskih podataka u SPR-u postoji i za svaku lokalnu pravnu jedinicu, kao i pregled veze s odgovarajućom pravnom jedinicom i odgovarajućom lokalnom jedinicom.

4.4. Preduzeće

Osnovna statistička jedinica za ekonomske podatke je preduzeće. Može obuhvatati više od jedne pravne jedinice. Podaci inicijalno dolaze iz administrativnog sistema, ali se mogu korigovati informacijama koje su dobijene iz statističkih istraživanja. U statističkom poslovnom registru se pod preduzećem podrazumijevaju i preduzetnici.

Za svaku pravnu jedinicu kreirano je jedno preduzeće tako da postoji veza 1:1. Pored glavne djelatnosti moguć je upis i do 3 sporedne djelatnosti. To znači da je omogućen pregled najvažnijih djelatnosti kojima se preduzeće bavi.

Varijable koje se prate za preduzeće su sljedeće:

jedinstveni statistički broj preduzeća, trinaestocifreni porezni broj, RS matični broj, status aktivnosti, puni naziv, skraćeni naziv, djelatnost, datum registracije, datum zadnje promjene, datum gašenja, entitet, kanton/regija, općina, naselje, poštanski broj, naziv ulice i broj objekta, telefon, fax, e-mail, izvor za ažuriranje i ispravke.

U SPR-u se može vršiti pregled finansijskih podataka, podataka o zaposlenosti, historije, istraživanja u kojima se pojavljuje preduzeće, kao i pregled veza s pravnom jedinicom i lokalnim jedinicama.

4.5. Lokalna jedinica

Lokalna jedinica je preduzeće ili njegov dio (npr. radionica, fabrika, skladište, kancelarija, rudnik, stovarište) smješteno na geografski tačno određenom mjestu. Na svakom ili sa svakog od tih mjesta, izuzev u nekim posebnim slučajevima, jedna ili više osoba obavlja neku ekonomsku djelatnost (nekad i samo dio radnog vremena), za isto preduzeće. Jedno preduzeće može imati više od jedne lokalne jedinice.

U SPR-u postoji razlika između „glavne“ lokalne jedinice i „ostalih“ lokalnih jedinica.

Glavna lokalna jedinica je lokalna jedinica koja je kreirana kada je kreirano i preduzeće i nalazi se na istoj adresi kao i preduzeće. Podrazumijeva se da će glavna lokalna jedinica imati istu adresu kao i preduzeće. Takođe, treba napomenuti da za svako preduzeće može postojati jedna i samo jedna glavna lokalna jedinica.

Ostale lokalne jedinice su one koje su kreirane iz lokalnih pravnih jedinica kao i iz podataka nakon provedenih istraživanja.

Pored glavne djelatnosti, svaka lokalna jedinica može imati i tri sporedne djelatnosti. Preko menija na lokalnoj jedinici moguće je vršiti pregled veze s preduzećem i odgovarajućom lokalnom pravnom jedinicom.

4.6. Jedinica izvještavanja

Jedinica izvještavanja je jedinica kojoj se dostavljaju upitnici za konkretna statistička istraživanja. Ova jedinica može da bude preduzeće ili lokalna jedinica.

Za određenu jedinicu izvještavanja moguće je vidjeti: trinaestocifreni porezni broj, RS matični broj, naziv, ulicu i broj, općinu, poštanski broj, odjeljenje (kanton/regija/distrikt), podatke u vezi sa kontakt osobom, datum zadnje promjene, instancu jedinice izvještavanja (historijske podatke) i vezu sa odgovarajućom jedinicom posmatranja.

4.7. Jedinica posmatranja

Jedinica posmatranja je ona jedinica za koju se kompiliraju statistički podaci u cilju praćenja njenih karakteristika. Statistički pokazatelji od značaja za konkretnu statističku aktivnost, a koji se izvode za konkretnu jedinicu prikazuju se na nivou jedinice posmatranja.

Za određenu jedinicu posmatranja moguće je vidjeti: trinaestocifreni porezni broj, RS matični broj, naziv, djelatnost, datum zadnje promjene, instancu jedinice posmatranja (historijske podatke), podatke iz istraživanja i vezu sa odgovarajućom jedinicom izvještavanja.

5. IZVORI I NAČIN PRIKUPLJANJA PODATAKA


5.1. Izvori podataka za SPR

Osnovni izvori informacija o poslovnoj zajednici za SPR predstavljaju administrativni registri (administrativne evidencije o pravnim subjektima u entitetskim institucijama), statistički izvori (informacije prikupljene kroz različita statistička istraživanja) i ostali administrativni izvori.

Administrativni registri entiteta i Brčko distrikta BiH predstavljaju osnovni izvor odnosno podlogu za Statistički poslovni registar. Uvažavajući činjenicu da svi poslovni subjekti imaju pravnu obavezu registracije u administrativnim registrima, važno je naglasiti da se preuzimanjem podataka iz pomenutih registara, osigurava potpuna pokrivenost svih registrovanih poslovnih subjekata u Bosni i Hercegovini. U SPR-u se ovi podaci dopunjavaju i ažuriraju informacijama iz ostalih administrativnih izvora, kao i povratnim informacijama iz statističkih istraživanja.

Izvori podataka koji se koriste za ažuriranje SPR-a, prikazani su na Slici 2.

Slika 2. Izvori podataka za Statistički poslovni registar



5.2. Izvori za određivanje statusa aktivnosti preduzeća

U statističkom poslovnem registru za određivanje statusa aktivnosti preduzeća koriste se podaci iz **godišnjih finansijskih izvještaja** (završnih računa) i to podaci o prihodu i podaci o zaposlenosti. Podaci o prihodu predstavljaju godišnji prihod od poslovanja dok podaci o zaposlenosti predstavljaju podatke o prosječnom broju zaposlenih po osnovu stanja na kraju mjeseca. Na osnovu ovih informacija se vrši određivanje statusa aktivnosti preduzeća u SPR-u. Prema statusu aktivnosti, preduzeće može biti aktivno, mirujuće ili neaktivno.

Pored podataka o prihodu i broju zaposlenih iz godišnjih finansijskih izvještaja u SPR-u se nalaze i podaci iz drugih izvora koje metodolozi koriste prilikom odlučivanja o promjeni statusa aktivnosti preduzeća.

Kao dodatni izvori za određivanje statusa aktivnosti nekoj jedinici u SPR-u koriste se i informacije iz Jedinstvenog sistema registracije, kontrole i naplate doprinosa, raspoložive informacije iz statističkih istraživanja, službenih glasnika, podaci CB BiH, internetske stranice i sl.

- Iz **Jedinstvenog sistema registracije, kontrole i naplate doprinosa** koji je uspostavljen u Poreznoj upravi FBiH i Poreskoj upravi RS-a, kao relativno novog izvora informacija, dobijaju se podaci o ukupnom broju zaposlenih sa stanjem na kraju mjeseca koji se preuzimaju kvartalno i to sa stanjem marta, juna, septembra i decembra. Za Brčko distrikt BiH podaci iz ovog izvora se dobijaju od ove godine (2015.).
- Veoma važni izvori podataka za SPR su **statistička istraživanja**, godišnje i kratkoročne poslovne statistike jer daju godišnje, kvartalne i mjesečne informacije. Na osnovu povratnih informacija dobijenih iz provedenih statističkih istraživanja vrši se ažuriranje SPR-a.

- Kao dodatni izvor za određivanje statusa aktivnosti preduzeća u SPR-u koriste se i **podaci registra transakcijskih računa Centralne banke BiH** koje BHAS preuzima dva puta godišnje.
- **Informacije iz službenih glasnika** se koriste kao obavezan izvor za ažuriranje kako statusa aktivnosti, tako i ostalih podataka na preduzeću.
- **Informacije sa internetskih stranica** mogu takođe pomoći metodologu kod donošenja odluke o ažuriranju statusa aktivnosti preduzeća.

Uprava za indirektno oporezivanje Bosne i Hercegovine (UIO BiH) predstavlja značajan izvor informacija za ažuriranje podataka o prometu. Trenutno su u toku aktivnosti koje Agencija preduzima u cilju pribavljanja informacija iz UIO BiH.

6. AŽURIRANJE STATISTIČKOG POSLOVNOG REGISTRA

Agencija za statistiku BiH u saradnji sa entitetskim statističkim institucijama, vodi i održava konzistentnost podataka Statističkog poslovnog registra. Na osnovu metodoloških uputstava usklađenih sa preporukama Evropske unije, koje priprema Agencija u saradnji sa entitetskim zavodima za statistiku, ažuriranje SPR-a se odvija u entitetskim zavodima i ekspozituri Agencije za statistiku BiH u Brčko distriktu.

Podloga za ažuriranje SPR-a su, kako je prethodno objašnjeno, podaci iz administrativnih registara, statističkih izvora i ostalih administrativnih izvora.

Kako se ne bi ugrozilo zajedničko jezgro sistema, sve metodološke izmjene koje se naprave u SPR-u, moraju biti dogovorene od strane SPR tima tri statističke institucije.

6.1. Ažuriranje iz administrativnih registara

Statistički zavodi u entitetima i Brčko distriktu BiH u elektronskoj formi mjesečno dobijaju podatke iz administrativnih registara. Na osnovu ovih podataka, novoosnovani poslovni subjekti se automatski uključuju u statistički poslovni registar, a na isti se način preuzimaju i promjene u identifikacionim i demografskim karakteristikama. Ažuriranje podataka koji dolaze iz administrativnih izvora uglavnom se provodi automatski.

6.2. Ažuriranje iz ostalih izvora

Ažuriranje podataka SPR-a podacima koji dolaze iz istraživanja obavlja se ručno. Za sada je ažuriranje omogućeno samo zaposlenim u Odsjeku za statistički poslovni registar u entitetskim statističkim institucijama i Brčko Distriktu. Nakon dobijenih saznanja iz statističkog istraživanja, informacije se provjeravaju koristeći dodatne izvore podataka kao što su ostala statistička istraživanja, podaci iz Poreznih uprava, podaci Centralne banke BiH, informacije sa internetskih stranica i sl. i tek tada se radi ručno ažuriranje podataka pojedinih poslovnih subjekata.

- **Ažuriranje na osnovu statističkih istraživanja** - Ažuriranje podataka SPR-a podacima koji dolaze iz statističkih izvora se obavlja ručno. Nakon dobijenih saznanja iz statističkog istraživanja, u Odsjeku SPR-a informacije se provjeravaju koristeći dodatne izvore podataka kao što su ostala statistička istraživanja, podaci iz Poreznih uprava, podaci Centralne banke BiH, informacije sa internetskih stranica i sl. i tek tada se radi ručno ažuriranje podataka pojedinih poslovnih subjekata.

- **Ažuriranje nakon dobijenih podataka iz godišnjih finansijskih izvještaja** – U SPR-u se u drugom kvartalu, nakon dobijenih podataka iz godišnjih finansijskih izvještaja za prethodnu godinu, vrši provjera i ažuriranje statusa aktivnosti preduzeća i njihovih lokalnih jedinica na osnovu metodološkog dokumenta Agencije za statistiku BiH pod nazivom „Ažuriranje statusa aktivnosti u SPR-u“. Pomenuti metodološki dokument je usaglašen sa entitetskim zavodima i EU preporukama i sadrži pravila po kojima se treba rukovoditi prilikom promjene statusa aktivnosti statističkih jedinica SPR-a.
- **Ažuriranje dobijenim podacima iz Jedinstvenog sistema registracije, kontrole i naplate doprinosa** - Uspostavom Jedinstvenog sistema registracije, kontrole i naplate doprinosa koji vode i održavaju Porezne uprave entiteta, statističkim institucijama je omogućen pristup i korištenje podatka o broju zaposlenih u statističke svrhe. Podaci iz ovog izvora se odnose na tekuću godinu, za razliku od podataka iz finansijskih izvještaja, tako da se na taj način prate promjene podataka o zaposlenim (povećanje ili smanjenje u toku godine). Takođe, ove informacije se mogu uzeti u obzir kod odlučivanja o promjeni statusa aktivnosti preduzeća.
- **Ažuriranje na osnovu informacije iz Centralne banke BiH** - Pored podataka koji se preuzimaju iz administrativnih poslovnih registara, kao izvori za ažuriranje SPR-a koriste se i podaci iz **Jedinstvenog registra transakcijskih računa Centralne banke BiH**. Agencija za statistiku BiH preuzima podatke od Centralne banke dva puta godišnje te entitetima i BD dostavlja podatke koji se odnose na subjekte za koje su oni odgovorni. Podaci Jedinstvenog registra transakcijskih računa Centralne banke se koriste prilikom odlučivanja o promjeni statusa aktivnosti preduzeća.
- **Ažuriranje na osnovu informacije iz službenih glasnika - preduzeće u stečaju ili likvidaciji, internet stranica isl.**

Informacije iz službenih glasnika se koriste kao obavezan izvor za ažuriranje statusa aktivnosti pogotovo preduzeća koja su pokrenula postupak gašenja, stečaja ili likvidacije. Kako bi se ova preduzeća prepoznala u SPR-u se u polje naziva preduzeća upisuje pokrenut stečaj/likvidacija i sl.

Informacije sa internetskih stranica mogu takođe pomoći metodologu kod donošenja odluke o ažuriranju statusa aktivnosti preduzeća

7. PRISTUP STATISTIČKOM POSLOVNOM REGISTRU I RAZMJENA PODATAKA IZMEĐU STATISTIČKIH INSTITUCIJA

U statističkim institucijama organizaciona jedinica u kojoj je smješten statistički poslovni registar je odgovorna za vođenje i ažuriranje jedinica prema teritorijalnoj pripadnosti.

Ažuriranje i korekcija podataka na preduzeću i lokalnoj jedinici SPR-a vrši se isključivo u organizacionoj jedinici u kojoj se nalazi statistički poslovni registar.

Statističari imaju pravo pregleda svih podataka na pravnoj jedinici, lokalnoj pravnoj jedinici, preduzeću i lokalnoj jedinici.

Poseban dio aplikacije za SPR (istraživački dio) prilagođen je za smještanje odgovarajućih podataka iz svih statističkih istraživanja. Kroz istraživački dio statističari mogu pregledati podatke iz drugih statističkih istraživanja, kao i podatke iz administrativnog, odnosno statističkog dijela SPR-a. Korekciju podataka na jedinici posmatranja i jedinici izvještavanja mogu vršiti statističari odgovorni za provođenje konkretnih statističkih istraživanja.

Da bi se uspostavljeni sistem SPR-a i održavao, neophodno je razmjenjivati informacije između svih statističkih institucija na dogovoreni način i u tačno određenim vremenskim intervalima.

7.1. Pristup bazi podataka SPR-a kroz aplikacije

Pravo pristupu SPR-a odnosno pravo pretraživanja i ažuriranja podataka može se posmatrati prema statističkim jedinicama koje čine SPR i to na sljedeći način:

- Administrativni dio:
 - Pravo pretraživanja imaju SPR i metodolozi statističkih istraživanja
 - Pravo ažuriranja pravne jedinice i lokalne pravne jedinice nema niko
- SPR dio:
 - Pravo pretraživanja imaju SPR i metodolozi statističkih istraživanja
 - Pravo ažuriranja preduzeća i lokalne jedinice ima SPR
- Istraživački dio:
 - Pravo pretraživanja imaju SPR i metodolozi statističkih istraživanja
 - Pravo ažuriranja na jedinici izvještavanja i jedinici posmatranja imaju metodolozi statističkih istraživanja čiji su konkretni podaci

7.2. Razmjena podataka između statističkih institucija

Agencija i entitetski statistički zavodi vrše razmjenu informacija o pravnim jedinicama, lokalnim pravnim jedinicama, preduzećima i lokalnim jedinicama. Identičnom kopijom SPR-a raspolaže svaka statistička institucija.

Agencija za statistiku kvartalno dobija ažurirane podatke iz entiteta i DB i to:

- 15.01. sa stanjem administrativnog registra na dan 31.12.
- 30.04. sa stanjem administrativnog registra na dan 31.03.
- 31.07. sa stanjem administrativnog registra na dan 30.06.
- 31.10. sa stanjem administrativnog registra na dan 30.09.

Pored finansijskih podataka i podataka o broju zaposlenih za preduzeća, ovi podaci se preuzimaju i za banke i mikrokreditne organizacije, osiguravajuća i reosiguravajuća društva i budžetske korisnike. Finansijski podaci i podaci o zaposlenosti se dostavljaju razvrstani u klasama, a ne u apsolutnim vrijednostima. Za preduzetnike postoje samo podaci o broju zaposlenih jer ne postoji pouzdan izvor finansijskih podataka.

Podatke o broju zaposlenih iz Jedinственog sistema registracije, kontrole i naplate doprinosa iz Federacije i Republike Srpske, Agencija dobija četiri puta godišnje. Od 2015. ove podatke dostavlja i Brčko distrikt BiH.

Prema dogovoru sa CB BiH, Agencija preuzima podatke dva puta godišnje (31.03. i 30.09.) i dostavlja ih entitetima i Brčko distriktu BiH zavisno od njihove nadležnosti.

Upotreba podataka iz SPR-a, od strane statističkih institucija je ograničena na potrebe statističkih institucija. Podaci koji su sadržani u SPR-u, ni pod kojim uslovima, se ne mogu razmjenjivati sa nekom trećom stranom.